



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Asian Wrestling Championships:
Aman Sehwat final-i iogo

Navalny tepuokdak mejangjaba
tashidak agi timtemer

VOL. XX NO. 181 (ADOK 181) DIMAPUR ROGONÜ (FRIDAY)

RONGCHII (APRIL) 14, 2023

₹ 5.00

PHED-i JJM atema Social Behaviour Change Communication tools saya



Department of Public Health and Engineering (PHED) ajanga Jal Jeevan Mission inyakym dak sendakba nung April 12, 2023 nü Social Behaviour Change Communication (SBCC) tools sayadang tangokba noksa ka yangi angur.

Kohima, Rongchii/April 13 (TYO): Jal Jeevan Mission (JJM) IEC inyakym asoshi Department of Public Health and Engineering (PHED) ajanga Social Behaviour Change Communication (SBCC) tools saya liasü.

Iba sentong ya April 12, 2023 nü State Implementing Support Agency (ISA) North-East Initiative Development Agency (NEIDA) den 4th State Level Coordination Committee meeting alidang Principal Secretary, E. Mhonbemo Patton aser Chief Engineer, Sanitation & WSSO, PHED, Thsathrichem Sangtam nungertem lia saya liasü.

Iba mission atema yimtsüngtem nung tajemtsü tzu agütsütsü asoshi sentong yangluba, mapa kuma inyakba, ketdangsüba aser anepaluba nung nüburtem kanga tongtipang aser kibur lir.

Jal Jeevan Mission yagi

yimdak yimtsüng nung kibung shia Functional Household Tap Connection (FHTC) agütsüba kisung masü saka water source kumzuka ayutsü, tzu kumdanga amshitsü, tzu tajung koda tongtipang, jana ketdangsüba, gender inclusion, operation aser maintenance atema water service fee bendenba amala awareness agütsütsü nükjidong lir.

Anungji iba mission aser scheme nung nüburtemi shilem agütsü asoshi rangloker inyaker.

Stakeholders balala den shisadokden senden amenba aser research study agiba nung ajemdaker SBCC Strategy aser hadir tem ya asateta yanglua liasü.

Kasa mapang capacity building aser SBCC campaign atema State ISA NEIDA ajanga Nagamese oshi nung yangluba animated video asem, English oshi aser local dialects trok nung yangluba poster trok saya liasü.

DAN chairman-i Dimapur Supermarket semdang



Dimapur, Rongchii/April 13 (TYO): Development Authority of Nagaland (DAN) chairman Dr. Watizulu Jamir den DAN ketdangsür temi Brehostibarnü Dimapur kübok Naga Shopping Arcade semdanga liasü.

Iba mapang parnoki küm shia iba tesem nung tzu atsüngtenba teblemtsü

asadanga liasü. Parnoki tzu mürekba, kilentzü aoba lenmangtem, jana bendenba aser staff quarters indang asadanga jembia liasü.

Küm shia Super market tesem nung meyi mapang tzu atsüngtenba ajanga anogoshi shishilempadak tesem nung timtem ajuru.

AK Mishra-i NSCN-IM & NNPGs tem den senden amen

Dimapur, Rongchii/April 13 (TYO): Ita ishia osangtsüsang balaka magitepi lia arur Central sorkar tenüng nung Naga nung yimten ken o jembir AK Mishra aser NSCN-IM lenirtem senden ka Rhododendron Hall, Chumoukedima police complex nung Brehostibarnü mena liasü.

NSCN-IM nungi züngsem 20 aliba telok ya general secretary Th. Muivah-i anir liasü aser Centre tenüng nung AK Mishra aser Joint Director, Intelligence Bureau Dr. Mandeep Singh liasü.

Iba senden ya anüngdang 11:00 ako nung tenzüik aser ghonda ana shi mena liasü.

Member Collective Leadership of NSCN-IM, Rh. Raising-i ashiba agi, tanü senden junga menogo aser Framework Agreement nung ajemdaker solution bushitsü molungtep.

India sorkar aser NSCN (IM) tsüngta 1997 nungi ceasefire nung lir aser parnok tsüngta Framework Agreement ya 2015 nung zülutepa liasü.

AK Mishra nungi Brehostibarnü senden amenba indang osang kecha agüja mali.

Iba sülen ano pai Naga National Political Groups (NNPGs) convenor N Kitovi-i anir züngsem ter den senden ka nikongdang Chumoukedima Police House nung mena liasü.

NNPGs osang kar ajanga ashiba agi, iba senden nung pei tangatetba aser teblembe lemsatet aser Government of India-i mera kecha magiba atema mepelaba lemsatetpa liasü.

Oting nung nisung tepseter anema ken o jembitsü temelaba mangur

Dimapur, Rongchii/April 13 (TYO): Sepaitemi December 5, 2021 nü Oting nung civilian tem tepsetba dak sendakba nung Nagaland Police ajanga Special Investigation Team (SIT) ka tenteta liasü. SIT yagi bushisüngdangba maparen tembangba sülen March 24, 2022 nü Department of Military Affairs, Ministry of Defence, Government of India dang iba lendong nung tai tonglokja alirtem asoshi Sanction for Prosecution meshia liasü, ta Nagaland Police sangdong ka ajanga ashi.

Bushisüngdangba maparen tembangba sülen mela aliba ama

temerenshi agütsütsü asoshi temelaba monguaka tai tonglokja alirtem anema ken o Hon'ble District and Session Court, Mon nung May 30, 2022 nü benoka liasü. Section 197 2) Cr.PC aser Armed Forces Special Powers Act (AFSPA) indang Section 6 kübok security forces tem duty inyakba mapang inyaksangshiba anema okadak ken o jembitsü asoshi Government of India nungi temelaba nüngdaker.

Kasa mapang tai tonglokja aliba Security Forces züngsemtem kinungtsü temi iba ken o mejembi ata alitsü asoshi Hon'ble Supreme Court dang asüngdanga liasü, ta sangdong

ajanga ashi.

Yamaji India nung tematiba court ajanga iba ken o nung talila inyaksangshiba anena atatsü totuyuba agütsü.

Iba mapang Department of Military Affairs, Ministry of Defence, Government of India mimhoa tai tonglokja alir sepa 30 prong atema Sanction for Prosecution magütsüteter, ta osang agütsü.

Ano ozüng nung shia aliba ama Prosecution Sanction magütsüba osang ya State Crime Cell Police Station aser SIT ajanga Hon'ble Court of District & Session Judge, Mon nem agütsüogo, ta sangdong ajangasa ashi.

Nagaland sorkar aser Manipal University tsüngta MoU ka zülutep

Dimapur, Rongchii/April 13 (TYO): Investment and Development Authority of Nagaland (IDAN) ajanga ketdangsüa Manipal Academy of Higher Education (MAHE), Karnataka aser Department of Health and Family Welfare (DHF) Nagaland aser Directorate of Technical Education (DTE), Nagaland tsüngta Memorandum of Understanding (MoU) ka April 13, 2023 nü zülutepa liasü.

Nüburtem aser matamabensar tem shisatsü tatongba aser sobaliba terenlok tali tajungba kumdaktsütsü asoshi lungjemer ajaklen ajanzüktsü nükjidong nung iba MoU ya zülutepa liasü.

MAHE ya India nung university tajungtem rongnung ka lir aser parnok ket nung technical aser professional tsütsü takotet nisungtem lir. MAHE ket nung education aser training agütsütsü facility lir aser wadang balala nung research agütsü facility lir aser India nung 'allied and healthcare professionals' atema mezüngbuba college temeja balaka lir.

MAHE yagi under graduation, post-graduation aser PhD degrees tem agütsür.

Iba MoU zülutepba ajanga Nagaland sorkar den MAHE ama agreement balala züluteptsü asoshi

educational institutions tajung aser tulutem tali adoktsü imlar, koba ajanga Nagaland nungi kaketshirtem asoshi academic tsütsü aser capacity building tsütsü maongka tali angutsü.

Manipal Academy of Higher Education (MAHE), Karnataka nung aliba BSc Radiotherapy technology, BSc Anesthesia technology, BSc Emergency Medicine Technology, Bachelor of Audiology & Speech Language, Bachelor of Occupational Language, Bachelor of Optometry, Bachelor of Physiotherapy, BSc Cardiovascular Technology, BSc Clinical Nutrition & Diabetes, BSc Exercise & Sports Sciences, BSc Health Information Management, BSc Medical Imaging Technology, BSc Laboratory Technology, BSc Laboratory (Lateral), Bachelor of Optometry (Lateral), BSc Medical Imaging Technology (Lateral), BSc Nuclear Medicine Technology, BSc Perfusion Technology, BSc Psychology, BSc Respiratory Therapy, BSc RRY & DT, BSc Physician Assistant aser Bachelor in Prosthetics & Orthotics atema küm shia Nagaland nungi kaketshir asoshi menden 200 agütsütsü.

Course nung shilem ka ama shimtetba candidate tem ajanga bendang lima nung maongka

agitetsü asoshi foreign language training agütsü aser iba training ya MAHE ajanga agütsütsü.

Menden wazüktsüba den külemi Nagaland nugi program 11 atema merit nung shimba kaketshir nem tang aliba fee shilem 25 agi tajemba agütsü. Tsürabortem senotsü khuret ajemdaktsütsü mechi IDAN aser MAHE ajanga tejangrar nem educational loan tem agütsütsü.

Iba sentong nung shilem ka ama MAHE aser Nagaland sorkari MoU atsülangtsü atema lenmang bushia BSc Nursing aser MSc Nursing aitaaktsütsü aser Articulation Programme for Commerce and Health Informatics atema India nung küm ana aser bendang lima nung küm ana training agütsütsü lenmang bushitsü.

Manipal Academy nung item undergraduate health professional programs agütsü jangra aliba kaketshir temi Capital Convention Hall, Kohima nung April 14, 2023 nü aser Tetso College, Sovima nung April 15, 2023 nü "Launchpad Education & Career Fair 2023" alidang MAHE ajanga lapokba stall nung oa metetbela sütettsü.

Item course indang fees structure tejagja IDAN indang website nung agütsütsü.

Angh La Ganesan-i Mokokchung semdang



April 13 nü Mokokchung semdangba mapang Nagaland Angh La Ganesan aser sorkar tenzükertem aser lokti tentet balala lenirtem DCs Conference Hall nung senden amenba mapang tangokba noksa nung angur.

Dimapur, Rongchii/April 13 (TYO): Nagaland Angh La Ganesan-i April 13 nü Mokokchung semdanga office balala tekolaktem aser district kübok lokti tentet balala nungi lenirtem den senden ka mena liasü.

Senden nung o jembiba mapang Angh-i, pai tang mezüngbuba district semdang ajisüaka pai, lenla balala nung mezüngpurtem asüba aser state aser North East nung jilatem rongnung temerektiba ka ta asübala Mokokchung district aser Aoertem indang osang tajung aika angashir liasü, ta ashi.

Angh-isa tawa tembangba General Election nung district nung aliba nüburtemi shilem tajung agiba atema tenüngsang agütsü aser nüburtemi shilem agi nungdang temzüng ozüng benoka inyaksangshitetsü ta ashi. Pai, lokti tejakdangi renloka odi ta süra election

inyakyim aser electorates tem sentoka metoktsütsüla ta ashi. Nüburtemi anogoshia tenüngdakattem indang jembiba mapang Angh-i, education, health care, tajemtsü tzü aser financial institutions amala tongtibang tenüngdakattem nüburtem kishizüng tonga bener otsütsüla aser talisa tekübokba jenjang nung alirtem atema jenjang tapet agütsütsüla ta ashi. Paisa, kanga dang tongtibang maparen dak sendaka aliba department ketdangsurtem dang nüburtem ajangzükdaksütsü atema sorkar sentongtem nendaka benoka inyaksangshitsü ajungshia liasü. Angh-i, Deputy Commissioner dang district nung scheme aser sentong balala benoka inyaksangshiba mapangshia lepa reprangshitsü aser metongmejen lira nükdong atongtsü atema jenjang tapet agütsü asoshi mepeshia liasü. Maneni Angh-i, Nagaland

nung yimden yimsüsüba tsütsü tebilemstü aliba ya yakta bentetsü aser Nagaland ya linük nung tanga teseitem den jangyu medema yimjiyimjung nung aotsü tamang akaba lemsatöp.

Senden nung Ao Senden, Watsu Mungdang, AKM, GB Union, All Ward Union, MCCI aser tanga lokti tentet balalai parnok tebilemstütem lemsatöp aser ULB Election, Naga Solution, Women empowerment, Civil Service Project (UPSC aspirant Trust Fund), Mokokchung nung tajemtsü tzü agi timtemba, district ajunga nung lenmang jenjang mejungi aliba amala onük dak sendakba nung parnok tebilemstütem lemsatöp. Iba dak sendakba nung Angh-i, pai ken o dak sendaka aliba minister tem aser Chief Minister dangi shiti yoktsü ta ashiba den pai akokba tashi teyari agütsütsü merangtsü, ta tenangzükba agütsü.

Chumoukedima DPDB senden menogo



Advisor, Urban Development & Municipal Affairs, Zhaleo Rio lenisüba nung DC's Conference Hall, Chumoukedima nung Chumoukedima DPDB senden amenba noksa nung angur.

Dimapur, Rongchii/April 13 (TYO): April ita atema Chumoukedima DPDB senden April 13 nü Advisor, Urban Development & Municipal Affairs, Zhaleo Rio lenisüba nung DC's Conference Hall, Chumoukedima nung menogo.

Senden nung Zhaleo Rio-i, züngsemtem pelashishia agizük aser parnoki kanga nendaka senden nung arua shilem agiba atema pelaba lemsatöp. Pai ashiba agi, Chumoukedima ya district tasen ka lir aser DPDB mendenbuba ama pa asoshi tinyaktsü tongtibangtibaji iba district ya modern model district ka kümdaktsütsü asoshi asütsü aser iba atema len sayutsü aser takok tashi teyari agütsütsü atema pa renema lir ta ashi.

Paisa, department balala dang Department tajungba küma renloka aotsü aser district terenlok atema maneni parnok mapa bendanga agüja inyaktsü ajungshi. Pai, Department tem dang central scheme balala benoktsü atema tejakdangi arua nongita yaritsü mepeshiba den senden nung sentong balalatem indang metetdaksüba ajanga inyakyim shitak benoka inyakba sayur ta ashi.

Maneni Rio-i, Department tem dang lokti ajangzüktsü atema tebilemstü tajungtem benoktsü aser district terenlok asoshi nüburtem tenzüktsü ayongzükba liasü.

Senden nung taoba senden nung sensak asema onüktem lepa reprangshi aser

Chumoukedima kübok Dhansirpar Sub-division nung Vihoshe yimtsü agizüktsü mulungtepa liasü. Senden nung sensak asema tanga onüktem rongnung Tenyiphe- II Village nung Magi Star Group Society züngoksemtüsü, Dhansirpar kübok Rankanyan aser Longsen yimtsü agizüktsü asoshi sensak asem aser house-i agizükba liasü. Shikato yimtsü agizüktsü asoshi taruba senden nung sensak asemtüsü lemtet. DAO (Agriculture) nem taruba DPDB senden nung department inyakyim lemsateptsü nongloktüsü. House-isa ita shia ternübuba nung senden amentsü atema teletetba agia liasü.

JSA: CTR 2023 dak sendakba nung senden amen

Dimapur, Rongchii/April 13 (TYO): Chief Secretary Nagaland, J Alam IAS-i ayongzükba Jal Shakti Abhiyan: Catch the Rain 2023 dak sendakba nung lepa reprangshiba senden ka April 13 nü Chief Secretary indang Conference Hall, Kohima nung menogo. Iba senden nung JSA: CTR 2023 kübok department temi shilem agia liasü.

JSA: CTR-2023 ya 2023 küm March 4 nü linük kübok yimtak yimtsü aser jila/yimti ajak ayimjema district ajak nung "Source Sustainability for Drinking Water" from 04.03.2023 to 30.11.2023" omen nung ajemdaker amenokogo.

Nüburtem nem tajemtsü tzü tajung agütsütsü asoshi tang aliba water source tem terenlok kanga nüngdaka aliba mapang

taküm JSA ya water sources tem tajungba küma yanglushitsü asoshi rangloker inyakdar.

Senden nung JSA kübok department balala nungi ketdangsurtem den sensaksema mapang Chief Secretary-i, Nagaland nung tzü agi anungba district pongu lir aser itemji Longleng, Kohima, Tuensang, Zunheboto, aser Kiphire lir ta ashi. Paisa, state nung tzü agi anungba ya tebilemstü tulu ka küma odar anungji state nung alirtem ajak atema sustainable water sources aser tzü rizünga ayutsü kanga tongtibang kümogo, ta ashi.

Paisa, teka amoka inyakba department tem dang masü saka sorkar aser nüburtemi iba inyakyim nung shilem tajung agütsü kanga tongtibang lir ta ashi.



Nagaland Education Project - The Lighthouse - Nagaland Enhancing Classroom Teaching and Resources (NECTAR) sentong kübok shilem ka ama, Govt. Middle School, Salangtem kaketshirtemi April 12 nü Marepkong Ward, Mokokchung nung aliba Industrial Training Institute semdangba mapang tangokba noksa nung angur. Mokokchung, 13th April, 2023

Longleng nung traffic awareness seminar agiogo

Dimapur, Rongchii/April 13 (TYO): Longleng Police aser Drivers Union Longleng na longjemer April 13 nü Superintendent of Police conference hall, Longleng nung traffic awareness seminar ka ayongzükba agiogo.

Sentong nung Superintendent of Police, Longleng Dr. Pritpal Kaur Betra, IPS-i, traffic etiquette, Motor Vehicle Act 1988, kuli kaketem nüngdakba, gari senzusenpong temzüng ozüng sülen anidaktsü nüngdakba, gari aniba mapang yi majemtsü aser mobile mamshitsüba amala tangazükbatem agütsü. Laisa, gari ka anishitsüji khuret tulu aser ajaki temzüng ozüng sülen tashi anga anidaktsü nüngdaker aser nüngdakba mapang nung teyari agütsütsüla, ta ashi.

Kasa mapang nung SDPO Longleng I. Bunglang Chang, NPS-i, Traffic offense (MV Act 1988) indang tangazükba agütsü, Limatemjen, I/C, traffic cell Longleng-i traffic temzüng ozüng aser temaitsütem indang metetdaksü aser Dr. Waulong, Phom District Hospital Longleng-i First Aid indang tangazükba agütsüba den inyaka sayua liasü.

Iba sentong nung District Drivers Union Longleng, Taxi Union Longleng, All Wards' representatives, Drivers, kaketshirtem, Police cadets, aser Medical Department-i shilem agia liasü. Sentong tembangba sülen District Hospital Longleng-i achayanga nüburtem temang angati agi tendangtsü aser bike anishirtem nem helmet lemja liasü.

AR-i tzü tank aser solar street light lemstü

Dimapur, Rongchii/April 13 (TYO): HQ IGAR (N) kübok Assam Rifles Mon battalion-i, April 12 nü Min district kübok L/Wamsa yimtsü nung tzü tank aser Solar Street Light lemstüogo.

Yimtsü nung tzü aser electricity agi anungba agi timtemba tebilemstü bentetsütsü asoshi iba jenjang ya agiogo. Iba ajanga yimtsü nung tanur taintem anogoshia tashi intoka tzü ataba nungi anisüngzük agütsütsü. Kasa mapang nung anonung timtem lendong ataloktsü aliba nungi jenbotsü atema Solar street lights-a agütsüogo.

Item osettem ya April 12 nü yimtsü ketdangsurtem nem bendanga agütsüogo. Assam Rifles-i iba mapa tajung benoka

inyakba atema yimdaklirtemi parnok dang kanga pelaba lemsatepogo.

Maneni Mon Battalion-isa, April 13 nü district kübok Nyanhu aser Longwa Wamsa nem tzü tank aser Solar Street Light agütsüogo.

Yimdaklirtem anogoshi anibelega tajemtsü tzü ataba nungi anisüngzük agütsütsü atema tzü tank agütsüogo aser lendong balala ataloktsü aliba nungi jenboa alitsü atema Solar street light tem agütsüogo.

Item osettem ya yimtsü ana nungi ketdangsurtem nem April 13 nü bendanga agütsüogo. AR-i yimdaklir anisüngzükdaksütsü atema tenla tajung agütsüba asoshi yimdaklirtemi kanga pelaba lemsatepogo.

Home minister Amit Shah-i J&K nung security tensa asadangogo

New Delhi, Rongchii/April 13 (Agencies): Brihostibarnü Union home minister, Amit Shah-i Jammu & Kashmir nung security tensa asadanga den külemi Line of Control aser International Border tensa-asadangogo.

Security sepaitemi Shah nem Jammu & Kashmir tensa osang metetdaksü aser iba senden nungji National Security Adviser Ajit Doval, Jammu & Kashmir Lieutenant Governor Manoj Sinha, Union Home Secretary Ajay Kumar Bhalla aser Jammu & Kashmir Director General of Police, Dilbag Singh nung densema tongti ketdangser aika aden.

Senden nungji Line of Control aser International Border nung security tensa atema jembia, arrtsülen nung ozüing alema bendangertem aitsü merangba aser J&K nung minorities anema inyakba tebilemtsü onüktem atema o lemtep, ta ketdangsertemi metetdaksü.

April 6 nü DGP Singh-i, tang

tashi Jammu & Kashmir nung telungpur tebilemtsü metembang, ajisüaka telungpurtem kanga ajema kümogo, ta metetdakja liasü.

Paisa, lisopur lanurtem aikati telungpur telok balala nung dena liasü, saka tangbo lanurtem aika meyipa aruogo, ta metetdaksü.

March 30 nüa Jammu & Kashmir kübok Kathua district nung Improvised Explosive Device (IED) ka apok saka nisung asüamaba mesüra yiruba osangbo maliasü.

Tawa Parliament nung sorkari, 2019 küm Jammu & Kashmir nung Arlla 370 agienba mapang nung tenzuka 2022 küm July ita tashi nung Kashmiri Pandit 5, Hindu aser Sikh nung 16 densema civilian 118 tepsetogo, ta metetdakja liasü.

2019 küm August 5 nü Jammu & Kashmir nung Arlla 370 agiena state jenjang agienadok aser Union territories ana- Jammu & Kashmir aser Ladakh kümja liasü.



New Delhi, April 13, 2023: Brihostibarnü New Delhi nung CPI(M) general secretary, Sitaram Yechury aser Bihar Chief Minister, Nitish Kumar na ajurua senden amenba sülen tenati osangbenertem den jembidang tangokba noksa nung angur.

Muslim aser Khristantem den shishilemba masütsü tenangzükba agi

New Delhi, April 13 (Agencies): April 08, 2023 nü Bemetera district kübok Biranpur yimdak tamangba lokti ana tsüingda rara adokba sülen tang tashi Central Chhattisgarh nung tensa mesüingmeteti lir; iba tatalokba sülen Jagdalpur nung right-wing teloktemi longkak ait aser Muslim nung aser Khristantem den shishilemba masütsü tenangzükba agi.

Tenangzükba agiba video ka online nung prokshi aser video nungji VHP lenir, Mukesh Chandak-i ketdangsüa tenangzükbaji agir.

Nisung 70-80 shi adenshia agiba sentong nungji taoba mapang BJP MP ka aser Chhattisgarh nung tamarener kibong ka nung züingsem liasü.

BJP-ibo iba sentong nungji party shilem kecha mali, ta shiogo, ajisüaka tenangzükba agiba sentong nungji adenertem rongnung taoba mapang Bastar nung MP, Dinesh Kashyap aser tamarener kibong nungji Kamal Chandra Bhanjdeo nata liasü. Iba dak alia BJP District president Roop Singh Mandavi-

a iba sentong nungji liasü. Tenangzükba nungji yamai shia lir, "Hindu nung masürtem- Muslim süaka Khristan süaka parnok den shishilemba masütsü, iba denji külemi Hindu nung ajaki pei doka aser business institutions nung 'Hindu nung meyong' ta metettsü atema signboard ayutsüla."

Biranpur nung yimsü balala amangertem tsüingda rara adokba sülen VHP-i ketdangsüa Muslim aser Khristantem anema iba tenangzükba agi.

Biranpur nung tamangba yimsü balala amanger ana kiyimba sentong ka nung lanurtem tsüingda rara adoka liasü aser iba tatalokba nungji nisung ka tenüing agi, Bhuneshvar Sahu asü aser police asem yirua liasü.

Mongolbarnüa kasa yimdak anasa yimsü balala amanger ana tepseter lia angu.

Chhattisgarh Chief Minister, Baghel-i iba tatalokba aitsüogo aser iba tatalokba dak sendakba nung police-i tang tashi nung nisung ti puogo.



April 13, 2023 nü Ato kilonser, Narendra Modi-i video conferencing ajanga Rashtriya Rozgar Mela sentong nung adenba noksa nung angur. Brihostibarnü pai nisung 71,000 nem appointment letters agütsüba sülen o jembia liasü.

Tesüiba ita 8 tsüingda tang mezüing nisung 10,000 dak Covid putet

New Delhi, Rongchii/April 13 (Agencies): India nung tesüiba ita ti tsüingda anogo ka kija nung nisung teimtiba dak coronavirus tashidak putetbaji tesüiba ghonda 24 tsüingda putetba liasü; linük nung ano nisung 10,158 dak coronavirus putetogo, ta Brihostibarnü Union health ministry-i metetdaksü.

Tang linük nung coronavirus agi teshirangdakpur 44,998 kümogo. Bodhbarnüa India nung nisung 7,830 dak coronavirus putetba liasü.

Tang anogo shia coronavirus

positive putetba shilem 4.42 kümogo aser hopta shia positive putetba shilem-a 4.02 kümogo.

Tang tashi nung linük nung coronavirus tashidak nung taneptsü anguba shilemji 98.71 lir aser iba tashidak agi asür shilem 1.19 lir, ta health ministry-i metetdaksü.

Iba tashidak agi shiranger 4,42,10,127 anepogo aser tang tashi nung coronavirus vaccine dose crore 220.66 agütsüogo, ta ministry-isa metetdaksü.

Bodhbarnü sorkar osang ka ajanga ashiba agi, India nung coronavirus ya Endemic stage

agi menepogo aser taruba anogo 10-12 tsüingda ano maneni nisung aika dak iba tashidak putetba sülen ano tanaben iba wara süngjemtsü.

Endemic stage nung waraji region kar nung dang proker saka pandemic stage nungbo waraji tesem tuluba mesüra alima tesem ajaklen proker.

Tang linük nung kanga bulua prokba coronavirus ya Omicron indang XBB.1.16 subvariant lir; iba variant atema shisabulutsü kecha mali, kechiyong vaccines ajanga ibaji akoker, ta health ministry-i metetdaksü.

Opposition telongjem atema maparen tejakleni odar: Yechury

New Delhi, April 13 (Agencies): Brihostibarnü CPI(M) general secretary, Sitaram Yechury-i, 2024 küm Lok Sabha election jakdang election longjemtsü atema inyakba maparen tejakleni odar aser opposition-i state level nung menden lemsatsü, ta metetdaksü.

New Delhi nung Bihar Chief Minister, Nitish Kumar ajurua senden amenba sülen osangbenertem den jembidang Yechury-i, third front ka tentettsüji takoktsü, ta ashi.

"Opposition telongjem atema inyakba maparen tejakleni odar. Opposition teloktep ka tentettsü aser state level nung menden lemsatsü," ta CPI(M) general secretary-i metetdaksü.

"Kerala nung Congress

party aser ozü party na tsüingda anemteper. Yangibo (Kerala) BJP-i metokteper," ta pai ashi.

"Third front ka tentettsüji takoktsü, ajisüaka ibaji election sülen ang tenteter," ta pai ashi.

"India nung fronts ji teti agia election agiba sülen ang tenteter; tatitshitsü agi 1996 küm United Front tentetba, 1998 küm election sülen NDA tentetba aser 2004 küm election sülen UPA tentetba densema lir," ta pai ashi.

Senden tembangba sülen Yechury-i twitter ajanga, "BJP aser Modi sorkari Indian Republic, Constitution aser democracy anema inyaker, anungji itemji kümzüksü atema secular party tem longjemtsü asoshi Bihar CM Nitish Kumar-i inyaktsü," ta metetdaksü.

Bodhbarnüa Bihar Chief Minister Kumar-i Congress Tir, Mallikarjun Kharge aser Congress lenir Rahul Gandhi na ajurua opposition party tem longjemtsü atema jembia liasü.

Bihar CM Kumar-isa Brihostibarnü CPI general secretary, D Raja-a ajuru.

Senden tembangba sülen Raja-i twitter ajanga, "JD(U) lenir aser Bihar CM Nitish Kumar den senden mena RSS-BJP anema opposition longjemtsü asoshi onük aika jembio. Tang linük tensa tamajung ka nung lir aser lokti balala nung nüburtemi BJP-i mejungi yimsüsüba anema ola adoker. Asen democracy aser nüburtem kümzüksü atema secular-democratic party tem longjemtsü nüngdak," ta metetdaksü.



Chattisgarh state kübok Jagdalpur nung VHP züingsemtemi Muslim nung aser Khristantem den shishilemba masütsü tenangzükba agidang tangokba noksa nung angur.



TIR YIMYIM

YIMOBILEM (EDITORIAL)

DIMAPUR ROGONÜ, RONGCHII (APRIL) 14, 2023

Tepuokdak alirtem

Tanü asung balaka linük nung ochimashiba aser tashiyim agi mapa tamajung inyakba maparen nung okadak ken o benoka jembiba aser obendangertemi tepuokdak ayutsü atema obendang agütsüba osang anogo shia angashir. Atangji, aibelenyonga nisung ka taküm piyong ta masüyonga küm ka ana tepuokdak ayutsüba temerenshijia tulu aser tejashitsüka lir. Aji oda, kodang tepuokdak ta südir atsü talang agi longdanga atsübanger aliba ki ka nung shibanga ayuba noksa ka jet ta asen mulungjangi arur. Atangji, yangjibo mapa meinyakyonga chiyongtsü mapang shitak shitak nung angutsü aser tanga mapatem bilema shisabolutsüa kecha malitsü. Iba tepuokdakji lialiabo yangji alirtemjiang pei kinunger aser medemer ama akümtsü. Aji oda, tepuokdak tesemjia yim balaka amato yangji lokti aser arogo tenteta alitsü. Yangjibo tangar anema ola adokyonga mangashitsü aser shingaia hau ta malitsü, anungji ajak ajema-ajema mapang shitak nung chiyongtsü, mejangtsü aser saksü ta senso tajung ka amai alir. Ajisüaka, kodang tepuokdak ki aser yangji alirtem indang bilemdangdir, tepuokdak ta asüba kiji atsü, jara aser merang kishitemji dangbo masü saka asenok kolok aser tangatetba shisatsütem yaa tepuokdak tesemji lir. Iba jagi Russia nung kaket zülur Fiodor Dostoievski-i ashir, "Freedom ta asüba nüchi tia nung alitsüba indang ya jara aser merang kishitemji dangbo masü, ibai asenok tangatetba lir aser nisungtem teti tepuokdak lidaktsütsü atema tasa tajungtibaji, parnok nem parnokji tepuokdak alir ta memetetdaksütsüba lir." Pai ashiba o den ya kodang tepuokdak alirtem tia aser tanü asenok libaliro indang medemdanga bilemdangdir, asenoki asenoksasa asenoka tepuokdak alirtema ta angatetsü. Atangji, asenokbo asen onülen kechaia moutettsüsa long jara agi atsübanga mali aser asenok onüadang aser arunüadang oliaruli ta mesütettsüsa merang kishi agia shibanga maka aser yinzü agia alena mali. Ajisüaka, asenoki memeteteter dang ashi asenok ya shitakba 'jail' nung puoka alirtem amaji shibangja lir. Atangji, asenok akoksatsüsa inyakba mapatem oa bushisüngdangtsü shingaia nokdanga maka aser asenok anema ochimashi mapatem inyakba anema ola madoktetsüsa shingaia asenok tebang shibangtsüa mali. Aji oda, asenok kecha ozüng agia asen temeten indang jembitsü aser asen meyong asen temeten bushitsü alena maka. Ajisüaka, tanü asenoki asen alidak asenok tenüng nung terenlok mapa tajung inyaktsüba ser nung meinyak ser sen ajunga agizüka achiyonga asenoki ola madoker. Aji asen kidang asenoki repranga lia asen züi shi tepi tapu atsür kimaleni bener aoyonga ola madok repranga yutsüba amai lir. Anüngdang asen kidang lia asen danüi asen an kidang nungi an ajak puzüka achiba asenoki angashir aser angur saka ola madok tanemi repranga yutsüba den kasa asenok onsara tali süngjema kümogo. Aji oda, asen lu nung züsentetba ajak tangari asen lia bener aoer aser asen tenüng nung tangari tachitsü tajemtsü dang masü senotsü dena aseni meteta agizüka agir, saka tenükjang rangshir dang ashi ola madoker. Asen meyong asen nem magütsür ser taila tesem aser taila tenüngtem noklangsa noklang zülur agizüka bener oadoker saka tenük dang longshir dang ashi tebang agibo ola kata madoker. Aji oda, asenok süngjema yaribo asen lima nung ya kenyongi ochimashir kata mali, tashiyim ta asüba mapa indangbo mangashidang ta asüba ajemalu nübortem aliba tesüngjem aser tesünep lima-ang ka asütsü amai lir. Ajisüaka, ochimashi, meshitak aser tashiyim agi tarazük majung aliba lima ka nung alir nübortemi ola madokba ya parnoki memeteteter dang ashi parnokji puoka aliba agi ola madoker. Parnoki parnokji par yimtak aser par town nung pei kidang sademsadema alir amai bilemer, kechiyong parnok mapang shitak nung chiyongtsü angur aser mejangnüdak mejanger aser saknüdang saaker aser tai inyakyonga shingaia kecha mashir. Aji oda, tepuokdak alir ser nung tepuokdak alir ta memeteti alirtemji tanü asenok lir. Asenoki asenok tepuokdak aliba kulijia memetet kechiyong asenoki asenok puoka lir ta memetet, ajisüaka asenoksasa asenok tepuokdak alitsüsa inyakba taiji asenoki asenok taküm intangintanga melitetba ajanga puokba lir. Asenoki asenoksasa asen mapa nung intangintanga litetlasang, asenok meyongbo asen meyonga ta 'freedom' nung aliba nisungi shitetba ama shitetla aser akümketa litetla.

OLEMSABANG

TENYAR PAUL TAKÜM NUNG TONGTIBANG TATALOKBA ASER PAI INYAKBA TONGTIBANG MAPA KAR INDANG LAISHIBA NUNG ALIBATEM TATSÜ AGI ZÜLUR:

Y. Imti Tziidir, Dimapur.

A.D. 5: Saul asoba küm 6 B.C. aser A.D.10 mapang nung aso saka Laishir aikati Saul

asoba küm A. D. 5 ta kuli asür. Talisa T.Mapa 7:58 nung "Asangur" ta aser Filimon tokong 9 nung "tambur Paul" ta aliba nungi takzütakponga pa asoba kümji A.D. 5 asütsü ta

Laishirtemi kuli asür. Saul ya Yihuda nung tenüng saka "Paul" ya Rom nung tenüng. Pa aso dang tenüng anaprong agütsü saka pai Bendanger tenüng "Paul" amshi. (T. Mapa 13:9)

* A.D. 35. Tsüngrem kulisür Stefan lung agi onset. (Tenyartem Mapa 7 :54- 60).

* A.D. 35: Saul temulung meyipba. (T. Mapa 9: 1-19). Saul tenüng Paul agi melen. (T. Mapa 13:9)

* A.D. 35-38: Paul Tenyar kümer Arabiai kulisüi aoba (Gal. 1:17). T. Mapa 9:23 jagi pai kuli asüba tali jangjatsür.

* A.D. 38: Yirusalem hapta ana semdangba. (T. Mapa 9:26-29; Gal. 1: 18-19).

* A.D. 38-43: Siria aser Kilikia nung Pauli Khrista osang sangdongba. (Gal. 1: 21.

* A.D. 43: Saul Siria lima Antioki Paul aruba (T. Mapa 11: 25-26).

* A.D. 43/44: Ayawara arutsü shinba atalok (T. Mapa 11:27-30; 12:25; Gal. 2:1-10)

* A.D. 44: Tsüngremi Herod chuba tepsetba. (T.Mapa 12:23).

* A.D. 46-48: Paul Missionary mapa inyaktsü bendangleni mezüng aoba. (T.Mapa 13:2-14:28).

* A.D. 48/49: Galatia shiti ya Syria lima Antiok nungi A.O. 47/48 nung zülu aser Laishir aikati A.D. 48 nung zülu ta kuli agütsür. Saka kari A.D. 48-58 nung zülu ta ashir.

* A.D. 49/50: Yirusalem Mungdang (T.Mapa 15:1-29; Gal. 2:1-10).

* A.D. 51 : 1 Tesalonika shiti Korint yimti nung alidang zülu. (T.Mapa 18:1-18)

* A.D.51/52: 2 Tesalonikaji Korint nungi zülu.

* A.D.51/52: Galilio Akaia nung Governor dangi Paul Yihuda nungeri anir ao. (T.Mapa 18: 12-17)

* A.D.50-52: Tanabuba bendang limai sayutsüngi aoba. (T. Mapa 15:40- 18:22).

* A.D.51/52: Galatia shiti Korint nung alidang zülu. Laishir karibo A.D. 48 nung zülu ta ashir.

* A.D. 52 : Yirusalem aser Antioki meyipa aru. (T.Mapa 18:22).

* A.D. 53 : Antiok nung alidang pai Galatia shiti zülu.

* A.D. 53-55 :Paul Efesa yimti nung liasü. (T. Mapa 19:1-20:1).

* A.D. 55: I Korint: Paul Efesa nung alidang zülu aser 2 Korint Makedonia nungi zülu.

* A.D. 53-57: Tasembenbuba Missionary aeni aoba (T.Mapa 18:23- 21:17)

* A.D. 57: Rom shiti ya Paul Korint nung alidang pai zülu ta Laishirtemi ashir.

* A.D. 57: Yirusalem nung sayutsüngia senzüdang pa apu. (T. Mapa 21:27-22:30)

* A.D. 57-59: Paul Kaisaria nung tepoukdak liasü. (T. Mapa 23:23- 26: 32).

* A.D. 59: Paul Romi aodang pa amenba rongji raksa. (T. Mapa 27: 41).

* A.D. 60: Pa Rom yimti nung alidang pai Efesa, Kolosi, Filimon kaketterem zülu.

* A.D. 59-61/62: Pa Rom yimti nung alidang pa tepoukdak ayu. (T. Mapa 28:16- 31).

* A.D. 61: Pa Rom yimti nung alidang Filipi (Philippians) kaket zülu.

* A.D.62: Rom tepoukdak nungi pa chiok.

* A.D. 62- 67: Peziibuba Sayutsüngi seniidang Kreta (Crete) nung inyak. (Tita 1:5).

* A.D. 63-65: Pa Filipi nung aliba mapang I Timoti, Tita aser Filipi zülu.

* A.D. 67 /68: 2 Timoti shiti ya Paul tepuokdak alidang züluba lir. (2 Tim. 4:6-8).

* A.D. 67/68: Paul tanabenbuba Rom yimti tepoukdak alidang züluba lir. (2 Tim. 4 :6-8).

* A.D. 67 /68: Rom yimti nung tepoukdak alidang Paul tepseta südaktsü. Temalen agüja aliba kümtemji record siia aliba nungi masü saka Laishirtemi record süa aliba nungi agiteta agütsür. Tatsü agi dang zülutsü atema tatalokba aser kümji dang agütsür. Agüja aliba Lai tekongtemji lapoka azüng nungang tali tejangjaba angatetsü.

Tazünger ajak Tsüngremi moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Emmanuel Rehabilitation Centre

(Join Mission of 10 Churches under Changtongya Area)

"Life in fullness"

Don't Let Drugs Abuse your Life
Fight Back those Cravings,
Say No to Alcohol.

- The Rehabilitation program is based on 12 Step Recovery Program and spiritual mentoring.
- Program aims at installing Back the Addict/Alcoholic self-image.
- Self-respect that he/she lost during the period of addiction.
- Course duration for 5 months.

Admission fee: ` 1,000/-

Mess fee: ` 4,000/- (All basic needs included)

Contact :

Sentiwapang
Convenor
+916009483848

Longsanungsang
Co-Ordinator
+919856812840

Mepumeren
Counselor
+918974417300

Pakistan nung Islamic kiralongrartemi ano Khristan ka khasetogo



April 12, 2023 nü Pakistan nung Balochistan province kübok Turbat nung aliba hospital ka nung arrshi küm 55 Khristan, Pervaiz Masih tasümang yua aliba noksa nung angur.

April 13, 2023: Pakistan kübok Balochistan province nung Islamic kiralongrartemi ano Khristan ka khasetogo; Khristan lenirtemi item ama tatalokba atema tebilemtsü akaba lemsatepba den külemi iba tatalokba sashia aitsüogo. April 12, 2023 anepdang Balochistan province kübok Turbat nung Jamia mosque anasa prangpong amer kar

motorbikes nung aruba sülen arrshi küm 55 Khristan, Pervaiz Masih dak injang 13 khaloktsü, ta police-i metetdaksü.

Tanur pezü tebu Masih ya Pakistan nung Punjab province nungi lir aser Balochistan nung sanitation worker liasü. April 12 anepdang pa khasetba sülen April 13 nü pa tasümangji Punjab province nung par kidangi bener ao.

Osangbener den jembidang parjabaso, Charles Masih-i, "Pai küno tanobosang onok den Easter külemi mongdaksütsü atema onok dangi yoka liasü. Eid ul-Fitr sodi mapang nung pa-a onok dangi arutsü sentong liasü," ta metetdaksü.

Perviaz Masih aianu kinüngbu tenüng-a Pervaiz Masih liasü aser pa-a 2018 küm Easter Sunday sülen anogo ka dang lirbo kiralongrartemi khaseta liasü.

Charles Masih-isa, "Balochi telok balalai tekümdangtsü metetdakja yimjak nung Punjabi nungertem tepseter, aser shingai ibaji menokdang. Onoki Tsüngrem dak dang tamang ayur, kechiyong reshikangshiyonga aremzüksü Pai sayur," ta ashi.

Taküm April 1 nunga Khyber Pakhtunkhwa province kübok Peshawar nung Khristan, Kashif Masih khaseta liasü.

Nütsüng million 225 aliba Pakistan nung nütsüng shilem 2 bo sanitation workers lir aser sanitation workers shilem 80 shibo Khristanem lir.

US nung ita 3 tsüngda Tenla ki anema inyakba tatalokba 69 liasü

April 13, 2023: Taküm küm tenzüker mezüngbuba ita asem (January-March) tsüngda US nung Tenla kitem anema inyakba tatalokba 69 liasü, aser ibaji tesüiba kümtem den medemangra kanga agi teimba lir, ta think-tank telok kati metetdaksü.

Washington D.C nung aliba think-tank Family Research Council-i 2023 küm mezüngbuba ita asem indang "Hostility Against Churches" report saya.

2023 küm Tenla ki amakba teimbaji January ita nung liasü (43), February ita nung tatalokba 14 aser March ita nung tatalokba 12 liasü.

Tesüiba küm pongu tsüngda January, February aser March itatem nung Tenla kitem anema inyakba tatalokba teimbaji 2023 küm lir, ta Family Research Council-i metetdaksü.

2020 küm nungbo mezüngbuba ita asem nung Tenla kitem anema inyakba tatalokba ka danga maliasü, ta parnokisa metetdaksü.

Tenla kitem amakbaji shilem 5 kuma lemsaa lir, aser itemji-Tenla ki bendoktsüba, mi agi rongdoktsüba, prangpong amshia amakba, bomb amshia

amokmerenba aser 'other category' lir. 2023 küm mezüngbuba ita asem nung Tenla ki bensatsüba tatalokba 53, mi amshia amakba tatalokba 10 aser prangpong amshia amakba tatalokba asem liasü. Iba dak alia bomb amshia amokmerenba tatalokba asem aser tanga 'category' nung ana liasü.

Tenla kitem anema inyakba tatalokbatem ya US kübok state 29 nung liasü. North Carolina nung tatalokba tenet, Ohio nung pongu, Tennessee nung aser Florida, Missouri den Pennsylvania shia nung tatalokba pezüzü liasü.

California, Montana, New Jersey, New York aser Oregon state tem nunga Tenla kitem amakba tatalokba asem liasü; Colorado, Connecticut, Georgia, Illinois, Kentucky, Louisiana, Maryland, Massachusetts, Mississippi, Nebraska, New Mexico, North Dakota, Oklahoma, South Carolina, Texas, Virginia aser Washington nung tatalokba anana liasü.

Tatalokba kar yamai liasü-Memphis, Tennessee nung aliba Holy Nation Church nung audio-visual osettsüset auya, Winston-Salem, North Carolina nung aliba

Dellabrook Presbyterian Church nung fire extinguisher amshi, Reading, Pennsylvania nung aliba Jesus Is Alive World Reading Center nung sound system, kichiba aina aser piano raksatsüba den menden aser carpet rongdoktsü, Portland, Oregon nung aliba Portland Korean Church nung mi senoktsü, Austin, Texas nung aliba Tenla ki ka nung dollar sen 200,000 jenjang osettsüset raksatsü.

Nashville, Tennessee nung aliba Khristan School ka prangpong amshia amak, Versailles, Missouri nung aliba Mennonite Arogo Tenla kidang injang 50 shi khaloktsü aser Shreveport, Louisiana nung aliba Praise Temple Baptist Tenla ki amakdang nisung pezü yirutsü.

Philadelphia, Pennsylvania nung aliba St. Dominic Catholic Tenla kima pipe-bomb rema toktsür liasü, Peverly, Ohio nung aliba Gracelife Chapel bomb amshia amaktsü amokmeren, Nashville nunga Tenla ki ka bomb amshia amaktsü amokmeren aser Springfield, Oregon nung aliba Crossfire Church nung nisung ka kotari agi yiruja liasü.

ANO GO ABEN TSÜNGREM DEN

Temulung Meranga Aküm T.ken 95:7-11

Tanü azüngba nungji tekümdangtsü ashiba o ka angur. "Tanü, o nenoki Pa ola angalasang: Nenok temulung temerang" (t.7,8). Israel kini ibai arem nung inyak. Ejiip nung Kanan tashi nung parnokki Tsüngrem mapa angu. Aser meyipa parnokki kechi inyak? Parnok mulungjang meranga kümdaktsü.

Asenoki asen temulungjang koda merangdaksür? Ibai inyakim ka lir aser aji Tsüngrem mapa nung ashishia aser Pa o magizükba nungi meilungi meilungi adokdaksür. Israel nungeri Pai aniba aser Pai mesüba nung nemnemshinem asü. Parnoki Tsüngrem O angashi aser asaa tashi mangai toktsü. Iba dangji Tsüngrem atitangba ta ajar. "Koba mapang nung ner tsüraburi ni atidang, tendang aser kü mapa angu. Iba putu den ni küm lir jashia liasü" (t.9).

Kodang nai mapa ngur pelatsü melen nemnemshishidir, kodang nai Pa o angashir aser asaa tashi mangalir- nai Tsüngrem atidanger. Ibai tila tanur kati tebu aser tetsü azüoktsü merangba ama lir. Kodang nai ne mulung merangdir, Tsüngremi ne taküm asoshi yuja aliba sendoker. Israel nungeri sayatenyatem angu. Parnoki osangji angashi. Parnok anogo shia mesü. Saka küm 40 tsüngda nung, Tejenba putu ajak asü. Parnoki parnok senmang ajungabo magitet.

Temulung temerang nokdangtsü nai kechi inyaktsüla? Temulung meyipang. Tsüngrem O angang aser aji ajemalua agizükang. Tsüngrem mapa ajia liang aser aji tenüng sanga agizükang. Nemnemba aser tashi mangaba anenang. Kibubaji külemang aser Pa tsüngdang ne mulungjang anüka liang.

Kodang nai Tsüngrem aser Pa temoatsütem teronem ama agidir, nai Pa tenüng asangba aser tashi angaba ajema asütsü. Item tekümdangtsü tekongtem temulung nung yuang: Ne mulungjang Tsüngrem O nem lapokjang aser Pa dang tashi angang.

Tesüiba küm 14 tsüngda Nigeria nung Khristan 52,000 tepsetogo

April 13, 2023: Tesüiba küm 1,041 tepsetogo aser kasa 14 tsüngda Nigeria nung Khristan 52,250 shi tepsetogo, ta April 10, 2023 nü report tasen ka ajanga metetdaksü.

"Martyred Christians in Nigeria" report ya Eastern Nigeria nung amenoka aliba International Society for Civil Liberties and Rule of Law (Intersociety) teloki renema liasü.

Intersociety-i, Nigeria nung Khristan 52,000 dak tema tepsetba nungjagi Khristan 30,250 bo 2015 küm Muhhamadu Buhari Tir akümba sülen tepsetba lir, ta metetdaksü.

Kasa report ajanga, Buhari ya Islam yimsü alia amanger ka asüba ajanga Khristanem jenti tepsetogo, ta Tir nem tai tongloktsü. Tesüiba küm 14 nungjisa telempet Muslim nunger 34,000-a tepsetogo, ta report nungji shia lir.

2023 küm nunga Nigeria nung kümtenzüker mezüngbuba anogo 100 (January 1 nungi April 10) tsüngda Khristan

Tir, Buhari yimsüsüba kübok Tenla ki 18,000 aser Khristan school 2,200 raksatsüogo.

Islamic kiralongrar telok balala den külemi auer telok balalai timtem agütsüba ajanga Khristan aikati pei ki toktsür jenshiogo aser Northern Nigeria nung Khristan million 50 shi taküm lendong ajurutsüsa lir, ta kasa report ajanga metetdaksü. Khristan million 5 shi pei ki toktsür ajenba sülen Internally Displaced Peoples' (IDP) camps aser refugee camps nung jenoka lir.

Release International telok nung otongdar, Andrew Boyd-i, "Iba report ya taoksatsüka lir. Nigeria nung Khristan asübayong nisung aika tepseter saka sorkari kecha masü ama toktsür. Iba denji külemi alima linüktemi-a ola madoki repranga dang toktsüba ngua kanga süngmanger aser aoksar," ta ashi.

AO OSHI ANGAZÜKDAK:
TANÜ ANGAZÜKTSÜBA OJANG



Pokyim

(v) chiyongtsü bushi (search of food)

* Nisungtem **pokyim** dang akümüli memeteti atemer.

Pokzüng

(adj) tebok tazüng (empty stomach)

* **Pokzüng** ser kimalen mesenzüsüla.

OLONG PAITEP # 6486

1					2			3
							4	
5		6			7			
8								9
							10	
				11	12			
		13						
14					15			
				16				

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsüngpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjiding - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6485 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsütsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

Agüja aliba noksa nung meputepi aliba 5 bushiang



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tepela Tasoba Anogo



Meghalaya HC-i CAPF yoktsü tuyu

Shillong, Rongchii/April 13 (Agencies): Meghalaya high court-i state nung ozüing alema nagmati belenshiba meita atatsü atema central armed police force (CAPF) yoktsü tetuyuba agütsüogo. Meghalaya high court-isa, union home ministry dang ozüing alema nagmati belenshiba meita atatsü atema CAPF company 10 yoktsü atema tetuyuba agütsüogo.

Iba tetuyuba ya ken o dak sendakba nung PIL ka angadamba mapang chief justice Sanjib Banerjee tekolak ser Meghalaya high court bench kati agüja liasü.

"Home Secretary ajanga Union Ministry of Home

Affairs dang state nung ozüing alema nagmati tua belenshiba lenmang nung meita atatsü aser aibelenertem aputsü atema Central Armed Police Force company 10 yoktsü tuyur; company tem ya parnok jurila inyaksangshitetsü mesüra local police officer tem den longjemer inyaksangshitetsü, koba court-i shimtsü," ta Meghalaya high court-i ashi.

Deputy solicitor general of India - Dr Mozika-i, Central Industrial Security Force (CISF)-i iba mapa agizüka inyaksü memulunger ta osang agütsüba sülen Meghalaya high court-i iba tetuyuba agüja liasü. Taoba mapang Meghalaya

sorkari state nung ozüing alema nagmati atuba azioktsü atema CRPF company 100 yoktsü atema sentong yangluba Meghalaya high court-i magizüki liasü.

HC-isa, CRPF koba State Police kübok inyaksangshir parnok melena shinga kübok inyaksangshi masütsü atema CISF yoktsü shidanga liasü.

"State nung maneni ozüing alema nagmati atur aser belenshir, aser state nung temzüng ozüing shidak benoka inyakdi süra tang aliba machinery ya amshiabo inyaksangshi mesütettsü," ta Meghalaya high court-i ashi.

Iba ken o ya ano April 27 nü angadangtsü.

Kinungtsü tepsetba atema nisung ka taküm tepeyong tepuokdaki yok

Agartala, Rongchii/April 13 (Agencies): South Tripura kübok Sabroom sub-division indang Additional sessions judge court-i, kinungtsü tepsetba atema nisung ka taküm tepeyong tepuokdak ayutsü atema obendang agütsüogo. Tetsürla yagi par tsürapur kidang nungi sen bener marutetba atema la tepseta liasü.

Tripura police-i ashiba agi, additional sessions judge, Sabroom South Tripura-i iba obendang ya agüja liasü.

Obendang agütsüba nung, "temalen shisema aliba onük dak ajemdaker ni nisung tepsetba atema IPC section 302 dak ajemdaker taküm tepeyong

tepuokdak ayutsü aser senchi sen 10000 agütsütsü aser ano ita trok tepuokdak ayutsü obendang agütsür," ta shia lir.

Iba ken o ya 2021 küm Tripura kübok Sabroom police station nung benoka liasü.

Ken o benokla teyi tantsüla Arati Roy (Munda) (45) ya Sabroom kübok Purba Ludhua ward no 5 nung alir Bikram Munda (50) den küm 20 tejakdang kibong aküm.

Tena nem Babita Munda (21) aser Joy Munda (16) ta tanur ana moaja lir.

Küm 6 shi tejakdang nungi Bikram Munda-i pa kinungtsü ya rishikangshi tenzük, kechiyong lai lar tsürapur ket nungi Bikram Munda akhangba

ama senotsü meshia bener marutet.

2021 küm April 11 aonung 11 ako shi nung Bikram Munda-i la kinungtsü tepsettsü atema la dak kerosene shiloktsü aser mi tsiklokja liasü aser iba ajanga la temang kanga mejungi rongsa.

Osang agütsür aser tangartemi la Sabroom Sub-divisional hospital-i anir ao aser idak nungjiagi ano Tepania Hospital Udaipur-i anir ao.

Arati Roy temang kanga majungba ajanga Tepania Hospital MO-i la temang tajungba anepalutsü atema GBP hospital-i anir aotsü tuyua liasü.

Iba sülen April 18 nü Arati Roy ya GBP hospital nung asü.

Assam: Modi-i HPCL nem tenüngsang agütsü

Guwahati, Rongchii/April 13 (Agencies): Ato Kilonser Narendra Modi-i Assam kübok Goalpara nung amenoka aliba Hindustan Petroleum Corporation Limited (HPCL) indang Liquefied Petroleum Gas (LPG) bottling plant-i linük asoshi kanga bendanga agüja inyakba atema tenüngsang agütsüogo.

Pai ashiba agi, iba ajanga Assam, Tripura aser Meghalaya nung aliba consumer tem nem

teyari tulu agütsütsü. Union Minister of State for Petroleum and Natural Gas Rameswar Teli-i tweet ka asüba telangzüba agütsüba mapang Ato Kilonser-i, "iba ajanga Assam, Tripura aser Meghalaya nung aliba consumer tem nem teyari tulu agütsütsü," ta ashi.

Rameswar Teli-i Twitter ajanga, "ali acre 30 shi nung amenoka iba bottling plant indang capacity ya 30 thousand

metric tons lir aser iba facility nung küm ka nung cylinder lakh 20 bottle süteter," ta ashi.

"Iba plant yagi distributors 50 ajanga Assam, Meghalaya aser Tripura nung consumer tem nem LPG cylinders agütsütsü.

"Sen crore 70 intoka yangluba iba project yagi tang aser tarutsü nung consumer tem ajak indang nungdakba peritsütsü ta meteta kanga nema adanger," ta Teli-isa shisem.



Shillong, April 13: Meghalaya Deputy Chief Minister Prestone Tynson-i Brehostibarnü ashiba agi, G20 senden atema renemshi tenzükogo, koba Shillong nung taruba hopta agitsü. April 17 aser 18 nü amentsü aliba G20 senden nung shilem agitsüpur nisung 120 shi agizüktsü atema state sorkar renema lir.

Navalny tepuokdak mejangjaba tashidak agi timtemer



Moscow, Rongchii/April 13 (Agencies): Russia nunger opposition politician nübu tejangja Alexey Navalny tepuokdaki mejangjaba tashidak agi tim atemer aser hopta ana shi nung temang tuozük seret 8 ajemogo, ta pa indang okatsüri ashi.

Moscow antüdoklen mile 115 shi pilar Melekhovo nung aliba maximum-security IK-6 penal colony nung Navalny atema ambulance ka Hokulbar aonung jaoka liasü.

Pa indang odongtar Kira Yarmysh-i Twitter nung video clip ka prokshiba nung, Hokulbarnü tepok nung mejangjaba timtem ka adok aser tepuokdak alirtem anepalutsü yua aliba doctor temi pa dak mozü tuloktsü aser itemji kechi mozüar ashitsü memolung, ta shia liasü.

"Alexey Navalny nem tanem tanemi miim agütsür alisü, temoung junga magütsüdahtsütsü mechi tanemi tepseter alitsü amai bilemer," ta Yarmysh-i Twitter post nung ashi.

"Pa temang nung tekangshi keter teyari magütsüi punishment cell ka nung yua lir," ta lai ashi.

Navalny nem miim agütsü

asü ta asüngdang dang, pa temang jenjang onoki memetet aser ibaji federal penitentiary service mapa lir, ta Kremlin-i langzüi.

Ashikülak mapa inyakba aser court mezüngmeshiba atema Navalny ya tepuokdak küm 11 ser tesadang ayutsü obendang agüja yangji litar aser pai Mongulbarnü Twitter ajanga pa solitary confinement kati anir ogo aser kanga timtema alir, ta shia liasü.

January ita nunga virus atema pa nem antibiotics agütsüba sülen tang ama tepok nung timtem liasü aser iba mapanga temang tuozük ajema akum, ta Yarmysh-i ashi.

German sorkari Bodhbarnü sangdong ka nung, Navalny temang tamajungba akumba asoshi shisabulor, ta shia liasü.

Taoba ita Navalny indang documentary video kati Oscar ngua liasü. Pa ya punishment cell tilaka nung mapang shia isolation nung ayur saka shiti zülutsü melar aser pa indang okatsür temi mapang shia pa semdangteter.

Navalny ya taoba mapang okatsür ka liasü aser Russia nunger takataiter tem asayamenüa yimjak nung aitsüba aser ochimashi mapa

inyakba temai adoktsüba yong küm ter tejakdang alimai meteta akum.

Pai pa political prisoner ka lir ta ashir aser pa bukumer temi Navalny ya Russia indang Nelson Mandela lir aser künü anogo pa tepuokdak nungi adoka linük anitsü ta ashir.

Russian ketdangsur temi pa aser pa sülen anidaker tem ya extremists aser US Central Intelligence Agency den tesendaktep lir aser Russia samatsütsü meranger, ta aitsür. Parnoki pa senzüsempongba nung tenokdangba agütsü aser pa sülen anidaker aika bendang limai jena ao.

2020 küm Navalny ya Siberia nung tayimtsü ka nung lia miim chidakja tepsettsü merangba nungi kumzük aser Western laboratory tests nung iba ya nerve agent ta putet.

Iba sülen Russia sorkar pa tepsettsü merang, ta Navalny-i tai ongloktsü.

Pa miim chisemba atema Germany nung temang anepalua amung saka pa sasa 2021 küm Russia-i meyipa aruba den külemi apu aser tepuokdaki yok.

Office of the Longkong Senso Mungdang TENÜNGSANG AGÜTSÜR

Sensosanger rongnungi sorkar tenzükba wadang nung jenjang temabai takok tulu ngua tutet nung Longkong Senso Mungdangti ajanga tenüngsang agütsür.

1. Wb. S. Senka Jamir, promoted to Joint Director, Horticulture Dept.
2. Wb. Limanungsang Jamir, promoted to Under Secretary, Nagaland Civil Secretariat.
3. Wt. Yashijungla, promoted to under Secretary, Nagaland Civil Secretariat.

Nenoki nendaka inyaktetbayong asen sensosanger ajak tejak tenteta pelasemer. Maneni nenok taküm aser maparen ajak nung temoatsü sudadjang ta Longkong Sensosanger ajaki Tsüngrem taochi aser lenisüba meshizüktsür.

Sd/-
I.Imti Lkr
Tir, LSM

Sd/-
Lipokmeren Imsong
Tongti Zülur, LSM

In the Court of
Principal District & Sessions Judge
Mokokchung: Nagaland

S/C NO. 35/2023

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Loshely Sangtam has been applied by Shri. Ekuto S/o Lt. Loshely Sangtam, R/o H. No. 116 Majakong Ward, Mokokchung, Nagaland for possession of:

1. Closing PPO. No. S/028378/86
2. Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 03.05.2023 Given under the hand and seal of the court on this the 03.04.2023.

Sd/-
Principal District & Sessions Judge
Mokokchung: Nagaland

North Korea-i ballistic missile tasen ka tendang

Tokyo, Rongchii/April 13 (Agencies): North Korea-i ballistic missile tasen ka tendanga Korean Peninsula aser Japan tsüngta züyüm nung tsük aser iba yongji Tokyo-i anema nokdak, kechiaser iba nok-nü ya Hokkaido asetkong nung mesüra iba anasa tsüktsü tetsübo nung nüburtem ainshitsü tuyua liasü.

South Korea indang Joint Chiefs of Staff (JCS) ajanga ashiba agi, North Korea nunger

missile ya par linük yimtiba, Pyongyang anasa tesem ka nungi Brehostibarnep 7:23 ako nung khaloktsü.

Iba missile ya intermediate-range mesüra talangba ta temolung melemi lir aser Korean Peninsula aser Japan tsüngta züyüm leni mile 621 (kilometer 1,000) shi ao aser züyüm nung tsük, ta JCS ajanga ashi aser ibai rara mesüba maparen tamajung ka lir ta shia liasü.

Japan-ia missile ya züyüm nung tsük ta ashi saka iba missile tsükba indang tejangba mashi.

"South Korea aser United States indang itdangter temi iba missile tali tejangjaba nung asadanger," ta JCS ajanga osangbener dang text message ka nung ashi.

Tang tendangba ya nok-nü tasen ka tawa military parades nung sayuba alitsü akok aser iba ya solid-fuel missile asütsüa akok, ta mitkar ketdangsur kati ashi. Liquid fuelled dang nungibo solid fuel technology ajanga rocket tem temelaba aser tekeraba nung bener senzüteter.

Missile ya Hokkaido asetkong leni arur ta bilema nüburtem ainshitsü totuyuba agüja aliba agiener Tokyo-i North Korea inyakyim mechi "strong protest" ka tenzükogo, ta defence ketdangsur kati ashi. Taoba küm October ita North Korea-i intermediate-range missile ka Japan tsütsüi khaloktsüba mapanga nüburtem ainshitsü totuyuba agüja liasü. iba missile ya Pacific Ocean nung tsüka liasü.

Brehostibarnü iba missile khadokba sülen Seoul nung par National Security Council ajungbener senden ka jatep aser North Korea aija liasü.

Washington, DC nunga White House-i iba missile tendangba ya aitsü aser ibai UN Security Council pangzüng balala nung aibelenba lir ta ashi aser linük balala dang Pyongyang inyakyim aitsütsü ajungshia liasü.

CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.com

We design your child's future

IN LOVE AND



We build your child's career

TRUTH WE STRIVE

ADMISSION FORMS & PROSPECTUS

FOR CLASS 11

(ARTS & COMMERCE) 2023-24

FOR BOYS & GIRLS

AVAILABLE AT THE SCHOOL OFFICE

DURING OFFICE HOUR

BETWEEN (9:00AM - 1:00 PM)

SPECIAL FEATURES

1. Qualified, Trained & Dedicated Teachers
1. Summer Bible School
2. Scripture Retreat & Counseling
3. Career Guidance Cell
4. Smart Board Classrooms
5. Hostel for Boys
6. Bus Service
7. NCC
8. Club Activities

Patil & Moudgil na nem President's Cup akokba senpet agütsütsü



Rudranksh Patil

Anjum Moudgil

Rongchii/April 13, 2023 (Agencies): India tsürtem rongnungi world champion rifle shooter Rudranksh Patil aser la teammate Anjum Moudgil na nem nangzükba ama taoba kum President's Cup nung gold aser silver medal anguba atema senpet agütsütsü.

Senpet angutsü mangutsü mejangjai aliba ya International Shooting Sport Federation (ISSF) nung lenirtem melenshiba ajanga liasü.

Rudranksh-i taoba kum November ita Cairo nung the President's Cup akokba atema la takum nung senpet sen

(euros 15,000; sen lakh 13.25 shi) timtiba agizüksü liasü aser Anjum-a women's rifle 3-positions event nung silver anguba atema sen lakh 6.25 shi agizüksü liasü.

Ajisüaka taoba ISSF tekolakba Vladimir Lisin, pa menden nungi atsüngtokba sülen nangzükba ama senpet magütsüteni liasü.

Bodhbarnü ISSF tekolakba Luciano Rossi-i, nangzükba ama inyaksü aser iba asayamung nung medal ngua aliba asayar ajak nem senpet agütsütsü ta ashi.

President's Cup nung 2022 world rankings dak ajemdaker individual Olympic shooting

event ajak nungi temaba jenjang nung aliba asayar teranana asayar aser takum senpet sen 792,000 euros agütsü.

Taoba kum asaya shia nem senpet euro 66,000 agütsü aser takokeri euro 15,000 aazüka liasü.

"Temeim asayartem President Cup 2022 atema senpet agütsütsü asoshi ISSF-i tenangzüktepba ka yangluogo aser nangzükba ama agütsütsü," ta Rossi-i ashi.

Paisa, temzüng ozüng dak ajemdaker mapang talang ka raraba sülen shooter tem atema senotsü ngutetogo, ta ashi.

Asian Wrestling Championships: Aman Sehrawat final-i iogo



Aman Sehrawat

New Delhi, Rongchii/April 13 (Agencies): India nunger wrestler Aman Sehrawat, Astana nung tang asaya aliba Asian Wrestling Championships nung 57kg category nung Brehostibarnü final-i iogo Sehrawat, shiba Delhi nung

nüngtugu Chhatrasal stadium nung training agir, pai senior jenjang nung maneni kanga junga asaya quarter-final nung Japan nunger asayar Rikuto Arai 7-1 agi akokba aser iba sülen semifinal nung China nunger asayar Wanhao Zou 7-4 agi

koka liasü.

Sehrawat, shibai taoba kum U23 World Championships kokogo, pa final nung Kyrgyzstan nunger asayar Almaz Smanbekov den asayatsü.

Sehrawat-i 2023 season nung February ita Zagreb Open nunga bronze medal nguogo aser iba asayamung nung medal kabosa angutsü jangjaogo.

Brehostibarnü ano India nunger asayar anati bronze-medal round tongtetogo. Deepak Kukna (79kg) aser Deepak Nehra (97kg) na semifinal nung tamakok anguba sülen bronze medal atema asayatsü.

Ajisüaka kasa anogo Anuj Kumar (65kg) aser Mulayam Yadav (70kg) nabo medal round metongteti tsükatokogo.

Iba asayamung nung India nunger asayartemi tang tashi nung medal 11 ngua lir. Greco-Roman wrestler temi medal pezü angu aser tetsür asayartemi medal tenet ngua lir.

4th Mokokchung Town Inter-Ward Football asayamung osang

Mokokchung, Rongchii/ April 1 (TYO): April 10 nung toagi 4 buba Mokokchung Town Inter-Ward Football Tournament 2023 yangi Imkongmeren Sports Complex, Mokokchung nung asayadar. Tanü April 13 nü league match mezüng asaya Pool - D nungi Sangtemla Ward o Tongdentsüyong Ward na asayaba, Sangtemla-i goal 2-1 agi Tongdentsüyong madak takok angu.

Tanbuba asaya Pool - C nungi Lijaba Lijen Ward o Kumlong Ward na tsüngta asayaba, Lijaba Lijen-i goal 2-1 agi Kumlong pur koka liasü.

Mezüng asaya Sangtemla o Tongdentsüyong na asayadang, mezüng goal ji Tongdentsüyong striker jersey No. 7- Tarepnungsang-i minute 35 nung idaktsü. Saka kopi meli-i Sangtemla nungi forward jersey No. 9 - R. Achi-i 39 minute nung iba goal kaji küptoka kasasa kümdaktsü. Aji sür, takokba goal kaji Sangtemla midfielder jersey No. 8 - Lanuwapang-i

minute 51 nung idakja iba asaya goal 2-1 agi akok.

Tanabuba asaya, Lijaba Lijen o Kumlong na asayaba, mezüng goal ji minute 2 sür second ishika dang or lia Kumlong nungi jersey No. 10 forward - Mademshiba-i agütsü. Aji sür, mezüng asaya tesadang tashibo Kumlong-i goal ka jagi parnok takoklen liasü.

Asayartem anisüngzük agir külen asayaji kheni melenshitok, aji oda, Lijaba Lijen nungi forward jersey No. 11 - Akumsangba aser par medemer midfielder jersey No. 5. Rongsennungba tenati minute 46 nung goal ka aser tanabuba goal ji minute 56 nung yoka iba asaya Lijaba Lijen-i 2-1 agi Kumlong pur madak takok ngua liasü.

April 14, 2023 asaya yamai alitsü:


- 1st: Arkong Ward Vs Marepkong Ward @ 12:00 noon
- 2nd: Dilong Ward Vs Artang Ward @ 1:30 PM
- 3rd: Penli Ward Vs Alempang Ward @ 3:00 PM.

YR&S-i takok tajung anguba asayartem jaoker

Dimapur, Rongchii/April 13 (TYO): Department of Youth Resources and Sports Nagaland, Kohima-i sangdong ka ajanga, 2020 kum April ita nungi 2021 kum March ita; 2021 kum April ita nungi 2022 kum March ita aser 2022 kum April ita nungi 2023 kum March ita tashi nung

recognized discipline tem nung medal ngur aliba asayartem jaokogo.

Temsüa aliba candidate tem dang parnoki takok anguba kuli kakettek parnok asaya Association tem ajanga 2023 kum June 30 nü tashi nungbo Directorate Office nung benoktsü metetdaksüogo.



Astana, Kazakhstan nung tang asaya aliba Asian Wrestling Championship nung bronze medal anguba sülen India tsür Reetika Hooda medal amer tangokba noksa nung angur.

BILEMDANGANG
"Memetetra angazüksü renema liang."